

Pader Alexander Beer

CR 1972 pag. 339



«Lein dir gie tier la veglia da Diu, pertgei el ei carezia. Lein viver aschia che nus sesanfleien puspei ensem tier Diu il Bab. Buca bargi per mei, mobeinlein urar in per l'auter.» Quels plaids ord il testament spiritual da pader Alexander expriman il meglier sia tenuta, siu sentir e patertgar: En tutta sempladad far la veglia da Diu. Gl'ei ver, nus havein breigia da capir pertgei il Segner ha clamaui siu survient, pader Alexander aschi baul - haveva el gie strusch 50 onns - ordmiez siu fritgeivel operar sco missiunari en l'Africa. Sco siu superiur, il pader provinzial Schnarwiler ha detg el riug da bara, anflein nus forsa la risposta sin quella damonda els plaids da sogn Paul: «Seigi che nus vivien u murien, nus essan dil Segner.»

Pader Alexander Beer fuva oriunds da Camischolas. Leu eis el naschius ils 29 da schaner 1922. Ses geniturs Gion Andriu e Maria nata Curschellas ein gia igl atun 1924 sereratgs cun lur famiglia giul Thurgau a Wittershausen sper Aadorf, nua ch'ei han surprui in bein puril. Leu ha pader Alexander passentau ventireivels onns d'affonza cun ses 6 fargliuns. Gia baul sededesta en el il giavisch da vegnir missiunari. Per ils geniturs ha ei muntau in grond sacrifici da schar ir a scola lur fegl vegl ch'els havessan saviu duvrar bein a casa tier la gronda lavur sil bein puril. Tuttina han els bugen detg gie tier la veglia da Diu. 1934 entscheiva pader Alexander cun ils studis gimnasials tier ils paders alvs a Widnau, cuntinuescha e finescha quels cun la matura a Sogn Murezi el Valleis. Denton fuva la secunda uiara mundiala ruta o, ils confins serrai ed aschia sa pader Alexander buca ir en Algeria per preparar sia lavur da missiunari. El studegia zacons onns a Friburg, mo sto denteren prestar bia survetsch activ. Finida l'uiara astga el 1945 serender en Algeria per entrar el noviziat dils paders alvs. Ils studis da teologia fa el a Thibar sper Cartago/Africa. Ordinaus spiritual igl emprem da fevrier 1949 celebrescha el la messa nuviala a Tänikon e la stad sissu a Sedrun. Adina ha el salvau bien contact cun ses parents ed enconuschents en sia patria tuatschina.

Il giavisch da saver ir en las missiuns severifichescha buca aunc. Ses superiurs surdattan ad el in post d'administratur ed econom, 1949-53 en la claustra dils paders alvs a Widnau/SG, 1953-58 en la claustra centrala digl uorden a Ruma. Cun siu senn per uorden ed exactedad, sia biala scartira deva perdetga da quei, fuva el sco predestinaus per la lavur d'in econom. Denton siu grond desideri fuva aunc adina astgar ir en las missiuns. Finalmein, 1958 severifichescha quei giavisch. El astga serender sco missiunari el Congo, en l'Africa. Bein gleiti ha el empriu il lungatg indigen. Ussa sefiera el en la lavur da missiunari, va viado en las pleivs a far messa e priedi, administrar ils sogns sacraments e dar ductrina. Memia spert vegn quella lavur da missiunari interruttta. Igl onn 1964 dat ei gronds disturbis el Congo, ins sa dir revoluziun. Ina partida missiunaris dalla Belgia vegnan assassinai. Era pader Alexander e ses confrars vegnan pigliai e mess en perschun. Quei ei stau grevs dis, jamnas da temas e fetgas per ils missiunaris. Mintga di havess saviu purtar ad els la mort. Mo cun gl'agid da Diu pon els mitschar dil grond prighel. Star vinavon el Congo fuss pil mument nunpusseivel. Ils missiunaris ein sfurzai da turnar a casa en Svizra. Ils 4 onns (64-68) che pader Alexander sto star a casa resta el buca lischents. El gida o en las pleivs, entras priedis e referats sesprova el da perschuader la gieud dils gronds basegns dallas missiuns. Cu el sa 1968 puspei turnar en las missiuns el Congo, anfla el leu in pauper uorden. Tut quei ch'ils missiunaris havevan duront onns da strengta lavur e gronds sacrificis eregiu fuva destruiu. Mo ils paders missiunaris piardan buca la curascha. Ensem cun ils cristifideivels indigens semettan els alla lavur ed eregan puspei baselgias, scolas e spitals. Cunzun per baghegiar in center social ha pader Alexander impundiu sias forzas. Tgei plascher ha el giu cu el ha survegniu dall'unfrenda da cureisma svizra ina contribuziun per quei center social. En quei center social san giuvens africans ir a scola e vegnan, era instrui en differents mistregns per saver purtar quei ch'ei han empriu viado en ils vitgs.

Puspei sto pader Alexander interrumper sia lavur en las missiuns, quella ga per motivs da sanadad. Gia dapi zacons onns piteva el d'in grev mal el dies. Gia 1966, duront siu congredi sfurzau haveva el stuiu schar far ina operaziun.

Igl october 1969, pia mo in onn suenter ch'el haveva puspei entschiet cun siu operar en las missiuns, sto el turnar a casa en Svizra, serender el spital e sesuttametter ad ina greva operaziun. Era ina tiarza operaziun el spital cantunal a Turitg porta buca il giavischau migliurament. Pader Alexander vegn per part schiraus. Il davos da fenadur 1970 vegn el transportaus el spital a Lucern nua che las soras da s. Onna han bien quita per el. En ina brev a parents ed enconuschents sin Nadal scriva el: «Ussa sun jeu missiunari per l'Africa sco malsau en letg ed hael bia temps da far oraziun e caschun da sesacrificar per las missiuns.»

Gie, il Segner ha vuliu da siu survient buca mo la lavur sco missiunari, mobein era il sacrifici da sia veta. Bia ha pader Alexander opera quels paucs onns en l'Africa, forsa aunc pli bia ha el opera per las missiuns tras siu pitir en letg da malsogna. Ils 13 da mars 1971 ha Cristus retg clamau siu fideivel survient tier el en sia gloria.

Sias restonzas terrestras rauassan el santeri a Tänikon/TG. Pader Alexander vegli dal tschiel ano rugar per novas clamadas da missiunaris.

Sur Tumasch Berther

Gat Rorw. n. 22 / 26. 3. 1971

Pader Alexander Beer



L'jamna vargada ha la Gazzetta Romontscha purtau l'annunzia da mort da nies car convischin, missiunari pader Alexander Beer. Aunc sin Nadal haveva el secret ina liunga brev a ses enconuschents e benefacturs dallas missiuns. Bein haveva el en quella brev fatg da saver ch'el seigi malsausa el spital a Lucern, denton ch'ei seigi per pader Alexander gia da murir havessen nus buca sminau, eis el gie morts en la vegliadetgna da mo biabein 49 onns.

Pader Alexander Beer fuva oriunds da Tu-jetsch, Camischolas, nua ch'el ei naschiuss il 29 da schaner 1922. Ses geniturs, Gion Andriu e Maria nata Curschellas ein 1925 seretratgs cun la famiglia giul Turgau a Wittershausen nua ch'els han surpriu in grond bein puril. Bein fuva il far il pur pli bi ed emperneivel giu en la basa, denton ha ei era leu giu num luvrar e sparagnar per trer si ina famiglia da 7 affons. Pader Alexander fuva il vegl. Suenter la scola primara ha el fatg ils studis gimnasials a S. Murezi el Valleis ed a Friburg. 1945 eis el entraus el noviziat tier ils paders alvs en Algeria. Ils studis da teologia ha el fatg a Thibar sper Cartago (Africa). 1949 eis el vegnius ordinatus spiritual ed ha celebrau la messa nuviala a Tänikon/Tg. ed a Sedrun. Pader Alexander fuva in bien econom e contabilist. Gia sia biala e schubra scartira exprimeva senn per uorden ed exactedad. Perquei han ses superiurs mess el gl'emprem sin posts d'administraziun. 1949—53 eis el staus econom en la claustra dils paders alvs a Widnau/Sg, 1953—58 ha el giu il medem post en la claustra dils paders alvs a Ruma. Sch'in giuven entra en in uorden dallas missiuns ei siu

N 22 / 26. 3. 1971.

grond giavisch d'astgar ir en las missiuns. Aschia fuva ei era tier pader Alexander. 1958 ei quei giavisch finalmein ius per el en vigur, el ha astgau serender en las missiuns en l'Africa, el Congó. Era cheu ha el gl'emprem stiuu far igl econom en la casa centrala dils missiunaris. Suenter haver empriu il lungatg indigen mava el bugen las dumengia o en las pleivs a far messa, priedi, administrar ils sogns sacraments e dar ductrina. 1964 ha ei dau gronds disuordens e revoluziuns el Congo. Ils missiunaris han stiuu fugir. Era pader Alexander ei lu turnaus a casa en Svizra.

Quels 4 onns ch'el ha stiuu passentlar en Svizra eis el buca staus lischents, mobein era lu ha el luvrau per las missiuns cun far priedis e referats e collectar per las missiuns. Pér 1968 ha el puspei astgau serender en l'Africa. E tgei ha el anflau cheu? Tut quei ch'ils missiunaris havevan duront onns da strengta lavour e gronds sacrifice eregiu fuva destruiu tras la revoluziun. Mo ils paders missiunaris han buca piars la curascha. Pader Alexander e ses confrars ein ensemble cun ils cristifideivels indigens semess vid la lavour ed han puspei eregiu baselgias, scolas e spitals. Cunzun per baghegiar in center social ha pader Alexander impundiu sias forzas. En quei center social san giuvens africans ir a scola e vegnan era instrui en differents mistregns per saver purtar quei ch'ei han empriu viado en ils vitgs.

Pader Alexander haveva aunc priu en egl auters plans ch'el leva realisar en las missiuns. Denton pli che per zatgi auter vala per il missiunari il plaid: «Il carstgaun propona e Dieus dispona.» Gia igl october 1969 ha pader Alexander stiuu bandunar las missiuns, ir el spital e sesutametter ad ina operaziun pervia d'in tumor el dies. Ina emprema operaziun ha purtau mo per temps migliur. Era ina secunda operaziun il fenadur vargau el spital cantunal a Turitg ha buca giu il success giavischau. Dapi il davos fenadur eis el vegnius tgiraus dallas soras da s. Onna el spital a Lucern. En ina brev sin Nádal scriva el: «Ussa sun jeu missiunari per l'Africa sco malsau en letg ed hael bia temps da far oraziun e caschun da sesacrificar per las missiuns.»

Gie il Segner ha vuliu da siu survient buca mo la lavour sco missiunari, mobein era il sacrifici da sia veta. Sco missiunari ha pader Alexander operau bia en quels paucs onns, con el ha operau per las missiuns cun siu pitir en letg da malsogna, gliez sa mo il Segner. Ils 13 da mars ha Cristus Retg, per il reginavel dil quel el haveva luvräu ton, clamau siu fideivel survient tier el en sia gloria. Ils 17 da mars eis el vegnius satraus sil santeri a Tänikon/TG. Als geniturs e fargliuns da pader Alexander exprimin nus nossa sincera condolentscha. Pader Alexander vegli dal tschiel ano rugar per novas clamadas da missiunaris.

Tumasch Berther